

EVOUULUN

A quel estùdi se prepauso de cerca, dins la region que vendrié pièi Prouvènço, li biais qu'aguèron lis ome pèr s'assousta, dempièi li tèms pre-istouri e l'evoulun de soun abitage au fièu di milenàri enjusu'aro.

S'agis pas d'un estùdi saberu toucant la Prouvènço antico, mai simplamen d'assaja de mies couneisse li relicle recata dins lou terraire nostre e tambèn dins lou relarg proche que saren ana vesita.

Estùdi mena pèr la Clapouiro, escolo felibrenco, seicioun « Provençal » dóu C.D.C.,

Souto la beilié de Mirèio Barême

An participa à l'alestimen dóu libret : Camihe Barême

Louis Mathieu

Ramoun Michel

AU paleolithi, dins la tempouro dicho dóu mousterien, se retrobo la marco d'ome que visquèron à l'entour dóu Ventour, dins la valado d'Ouveso (baumo de la masco)dins la n-auto valado de la Nesco, e dins aquelo dóu Calavoun.

Leberoun a tambèn assousta aquelo civilisacioun subretout dins lou valoun de l'Aigo-brun que, de tout segur, sis aigo rajavon mai aboundoso que vuei.Lou valoun es enqueissa entre dous bàrri ribassu que fan dóu valoun uno gorgo espetaclouso.lou draïdu que n'en permet la vesito serpentejo entre-mitan dis avaus, di bouis gigant e di tihòu.e ribejo lou rièu que cascaiejo en cascado miniaturu ; à rode,semblo que dort dins de pichot plan de l'aigo lindo. Es meraviho de vèire lou rièu tant clar.

Lis ome de l'epoco èron subretout cassaire, siegue pèr assegura sa nourriture, siegue que,couchant la feruno qu'òcupavon li baumo, voulien faire siéu lis abri ansin counquista. Trouvavon aqui li peirard que ié fasien mestié pèr adouba sis óutis emai sis armo.

Dins li baus dóu valoun soun cavado de deseno de baumo e, de mai, noumbrouso soun lis avançado de roucas que serviguèron pèr abri. La mai espetaclouso se pòu vèire long dóu camin que meno à Fort de Buous, lou roucas fai coume un envans que soun bord es à 35 metre dóu baus. L'abri cuerb uno surfàci d'aperaqui 800 metre carra.

La baumo di peirard en amount de l'amèu di Seguin es tambèn forço couneigudo parié coume la baumo de Buous ounte s'es trouva en abounde d'oussamen e de peirard taia.

L'epoco proto-istourico recuerb uno tempouro que vai de 2000 à aperaqui 1000 an davans Jèsu. Lis ome an sourti de la pre-istòri; reston plus tant proche lou baus que lis assoustavo, n'an plus de besoun aro que sabon se basti d'oustau de pèiro ligado.

Parieramen se podon aliuencha de la mountagno que i'adusié li peirard pèr sis óutis e sis armo. Sabon travaia l'argielo mai tambèn li metau, sabon faire de coumèrci e d'escàmbi.

Sus lis auturo bastisson de fourtificacioun simplo, li castellas o castellaras (opida)

Acò se fai long di draio de passage, esvartant li baisso palunenco e lis escalado que sarien trop alassanto. Eron pas fa pèr ié vièure de longo mai rèn soulamen, toumbant lou cas, se i'assousta.

Li Ligour que vendran après ié vivran, éli, e ié restaran long-tèm.
